



Matadalan ba aplikante ba Pacific Engagement Visa (PEV):

Ita bele hetan serbisu hanesan saida iha Austrália?

Austrália mak país boot no luan ho indústriá barak no oportunidade ba serbisu iha estadu neen no territóriu rua. Ita bele hili atu hela iha ne'ebé de'it, maibé serbisu ne'ebé disponivel, no gastu sira hanesan gastu moris loroloron nian no gastu bainhira foin muda ba fatin ruma la hanesan iha fatin oioin. Matadalan ida-ne'e hato'o informasaun kona-ba área ka rejiaun balu hodibele ajuda ita buka serbisu.

! Informasaun importante

Bainhira buka serbisu iha Austrália, di'ak atu tetu didi'ak buat tuirmai:

- **Lokasaun ka área:** Austrália mak rai luan no estadu ida-idak iha klima, comunidade, no indústriá sira-ne'ebé la hanesan.
- **Saláriu no gastu moris loroloron nian:** Sidade balun no estadu balun iha oportunidade serbisu sira barak liu no saláriu aas liu, maibé iha fatin sira-ne'e, baibain gastu moris loroloron nian mós karun liu.
- **Komunidade sira:** Iha área balu iha comunidade husi illa Pasífiku ka Timor-Leste ne'ebé boot no estabesele ona no karik ita sei sente kmaan liu iha área hanesan ne'e.

Matadalan badak ba estadu no territóriu sira iha Austrália

🔄 Klima no comunidade sira

- **Northern Territory (NT), Queensland (QLD), no Western Australia (WA):** Estadu sira-ne'e iha klima tropikal atu hanesan klima iha illa Pasífiku sira no Timor-Leste.

- **Victoria (VIC), Tasmania (TAS) no South Australia (SA):** Klima iha estadu hirak-ne'e mak malirin liu, no iha tempu verão (bailoro), primavera, inverno, no outono.

🌐 Comunidade multikultural sira:

- **Komunidade Pasífiku** mak boot liu iha Queensland, New South Wales no Victoria.
 - **Iha New South Wales,** comunidade Pasífiku iha Blacktown, Liverpool, Campbelltown, Penrith no Canterbury-Bankstown
 - **Iha Queensland,** comunidade Pasífiku iha Logan, Brisbane, Ipswich, Gold Coast, no Moreton Bay.
 - **Iha Victoria,** iha comunidade ne'ebé estabesele ona iha Casey, Hume, Brimbank, Melton no Whittlesea.
- **Komunidade timoroan sira** ne'ebé mak estabesele liu iha Victoria no Northern Territory.
 - **Iha Northern Territory,** comunidade timoroan sira mak iha Darwin no Palmerston
 - **Iha Victoria,** iha comunidade timoroan iha Brimbank, Wyndham, no Maribyrnong.

\$= Gastu moris loroloron nian no saláriu

- **Gastu moris loroloron nian** ne'ebé karun liu: Sydney (New South Wales) no Melbourne (Victoria) iha

oportunidade ba serbisu barak liu maibé gastu moris loroloron nian mós karun liu

- **Saláriu boot sira:** Iha sidade ki'ik balun iha Queensland no Western Australia iha saláriu boot liu atu atraí traballadór ba fatin izoladu, maibé dala ruma susar atu buka-hetan hela fatin iha área sira-ne'e
- **Gastu moris loroloron nian ne'ebé barratu liu:** En jerál, gastu moris loroloron nian mak barratu liu iha South Australia no Tasmania, maibé optunidade buka-hetan serbisu mós menus liu.

Merkadu traballu iha fatin-fatin iha Austrália

Iha Austrália nia estadu no territóriu ida-idak iha tipu ka oin serbisu ne'ebé lahanesan. Porezemplu, estadu ho serbisu mineira nian (minerasaun) barak (hanesan WA, QLD, no NT) iha serbisu barak ho saláriu boot, maibé ita tenke hela iha fatin izoladu. Estadu seluk (hanesan NSW, VIC, no Australian Capital Territory (ACT)) iha tipu serbisu barak liu, maibé ema barak liu mós aplika ba vaga serbisu iha fatin sira-ne'e.

Iha fatin barak iha Austrália tomak iha serbisu agrikultura nian, maibé baibain serbisu ne'e mak kazuál ka temporáriu.

New South Wales (NSW)



- **Sidade boot:** Sydney
- **Indústria prinsipál sira:** Armazenamentu no fabrikasaun (Sydney osidentál), ospitalidade no turizmu (Sydney leste), eskritóriu korporativu sira (sidade sentru), kuidadu ba idozu sira no konstrusaun (iha sidade tomak)
- **Merkadu traballu maka'as,** signifika katak serbisu barak mak disponivel, maibé aluga uma bele karun, no gastu moris loroloron nian karun.

Victoria (VIC)



- **Sidade boot:** Melbourne
- **Indústria prinsipál sira:** Fabrikasaun, kuidadu saúde, no arte no indústria kriativu sira
- **Merkadu traballu Victoria nian** karakteriza ho vaga serbisu barak, partikularmente iha servisu sientífiku no tékniku sira – kresimentu ba servisu sira-ne'e mai husi ekonomia ida-ne'ebé diversu no buras.

Queensland (QLD)



- **Sidade boot:** Brisbane
- **Indústria prinsipál sira:** Turizmu, minerasaun, agrikultura, no kuidadu saúde
- Iha oportunidade serbisu sazonal barak, liuliu iha área rural sira. Maibé, dala ruma iha dezafiu kona-ba hetan uma iha área rural sira.

Western Australia (WA)



- **Sidade boot:** Perth
- **Indústria prinsipál sira:** Mineira, mina no gás, agrikultura, no turizmu
- Iha Western Australia iha fatin mineira ne'ebé izoladu barak, no serbisu balu presiza traballadór sira atu semo tama no sai. Tan ne'e, saláriu sira bele aas liu.
- Iha ezijénsia maka'as ba badaen ka ofísiu sira ne'ebé iha abilidade ba papél tékniku sira. Maibé, dala ruma iha dezafiu kona-ba hetan uma iha área izoladu sira.

South Australia (SA)



- **Sidade boot:** Adelaide
- **Indústria prinsipál sira:** Indústria tua nian, fabrikasaun, kuidadu saúde, no defeza
- South Australia iha merkadu traballu ne'ebé estavel ho empregu iha área kuidadu saúde, retallu (loja sira), konstrusaun, edukasaun no fabrikasaun. No mós, gastu moris loroloron nian iha estadu ne'e mak barratu liu duké estadu no territóriu sira seluk.

Tasmania (TAS)



- **Sidade boot:** Hobart
- **Indústria prinsipál sira:** Akikultura (hanesan haki'ak ikan), turizmu, ospitalidade, no agrikultura
- Estadu ne'e iha merkadu traballu ne'ebé ki'ik liu no klima ne'ebé malirin liu, maibé iha ezijénsia ne'ebé aumenta ba beibeik ba traballadór saúde sira.

Northern

Territory (NT)



- Sidade boot: Darwin
- Indústrria prinsipál sira: Iha eziyénsia boot ba traballadór sira iha maioria indústrria sira, liuliu minerasaun no ba badaen sira
- Merkadu traballu Northern Territory nian iha eziyénsia maka'as ba traballadór sira iha mineiru, kuidaú saúde no konstrusaun. Empregadór sira buka hela ema sira-ne'ebé hakarak harii sira-nia kareira iha territória ne'e.

Australian

Capital

Territory (ACT)



- Sidade boot: Canberra
- Indústrria prinsipál sira: Papél governu no nu'udar funsionáriu públiku sira
- Dala barak serbisu mak estavel maibé dala ruma rekezitu mak kualifikasaun universitáriu no sidadania Austrália nian.



Ita bele hetan informasaun liután kona-ba PEV nia Servisus Apoiu ba Empregu iha pev.gov.au

Iha ami-nia sítiu internét ita bele buka-hetan rekursu seluk tan, inklui follu faktu sira no matadalan atu kria rezume (resume templates). Ita mós bele tau naran ba Sesaun Informasaun kona-ba Empregu sira hodi aprende buat seluk tan kona-ba buka-hetan serbisu iha Austrália.

